

幾  
亭  
外  
書

幾亭外書卷八目錄

方技偶及

小序

絕技必近道

相變從目始

內相

心目相應

土色豕視

相有驗不驗

赤族不關乎相

借相審人才

相可覘世運

不自知

玄宗相福不相德

裴晉公器宇

不盈彌貴

相其語言

術家不自信其所行

命與卦課相似

傳神

幾亭外書卷八目錄

終

幾亭外書卷八

方技偶及

平湖

屠象美

全閱

嘉善

周丕顯

小序

方。技。君。子。所。不。爲。致。遠。恐。泥。然。泥。於。方。技。故。泥。也。以。方。技。爲。主。則。無。道。以。道。爲。主。則。亦。無。方。技。矣。

絕技必近道

方術到絕頂。無不稍稍通于道。君平卜日。管郭卦課。袁李天文星曆。張果祿命。楊賴堪輿。皆立身頗高。不肯教人以無恥無義之事。只緣窺着本原。畧信得死生有命。富貴在天。各有分限。欲中傷人人。不可得而傷。欲攫取多財。財不可得。而攫取壞心術。何爲不如循理安分。所以技術高者。決帶幾分道氣。今術家自負障天。甘心無賴。還是未窺見本原耳。就彼術中。更加窮究。當有幡然改心易行之時。

# 相變從目始

相隨心變。變從何始。必從目始。孟子云。胸中正則眸子瞭焉。蓋五臟之精華所聚也。如馳騫之人。變爲沉靜。其目必去昏而清。暴戾之人。變爲慈祥。其目必去殺而和。非但是也。其面之清濁。慈戾亦從而變。蓋肉色從氣血氣從心。無足致疑。非但是也。詞氣動容亦從心變。故凡內相無不變。外相之不可變者。獨骨格耳。執相定人。非也。荀卿不知心相之合而非相。又非也。但相人

者心不平正則目不清明我之眸子先眊矣雖  
遵孟子之法而實不能用

### 內相

何謂內相、品德居之矣、卽富貴貧賤亦有內相。  
意思行事是矣。貴人不諂而恭。富人不吝而儉。  
凡喜于靡費莫非貧相。凡近于驕蹇莫非賤相。  
不于其身亦于其子孫。噫子孫之貧賤現于祖  
父之身則內相之所係長矣。

### 心目相應

心目俱有五輪。觀目則知心。心圓者上。鈴次之。破梯者奸詐。月形者盜。弓形者惡死。此許洞相人說。諸家所不及也。皆以視之端。重閃忽定之。然不言其故。蓋圓屬土。土敦重居中央。心形似之。爲得其正。故目多平視。爲忠孝信誼之人。其人亦有土德。鈴形亦圓而稍長。中有腰痕。上小下大。火象也。心本君火。得其本形。故次土也。火性光明。故目視重大。有常能明禮義。破梯形則狹長而多痕。如梯之有層級。木象也。以主生客。



其氣浮而洩矣。木性輕搖隨物而動。故目視瞬息高下。言多虛妄。月形視圓者少半。蓋謂缺月非圓月也。水象也。主受客害。故目視百迴高下。流急不還。不忠不孝如水之無恒。弓形如鉤。鉤非金不能造。以主害客。懷毒息息在心。無已時矣。天下之殺物者必金也。亦還以自殺。故目視左右高下萬迴。爲叛迎之流如此人。雖未親見。然李肅謂趙思綰目亂語誕。必爲叛臣。殆其券云。夫五行各秉一性。各成一德。何獨三者純凶。

而無吉蓋象各有宜心爲君火君火之象必不可似木似水似金似則背背則凶原非三行有凶理也予旣悟此後試印流輩頗驗顧未能精耳孟子曰觀其眸子得此體貼以助聽言

### 土色豕視

尹鐸曰敦顏而土色者忍醜子順曰長目而豕視者必體方而心圓此二語大有佐于觀人顏色敦黃純得土氣若以好善卽當貞固不移若以行不善亦堅而難拔也子順孔子苗裔以目

視決人心辨詐通微先覺之故所從來遠矣

相有驗不驗

李元盛少有異相相者竝稱佳魏太武一見而異之其父崇每不樂後竟以驕縱誅馬周相當驟貴岑文本袁天綱皆知其不壽然周末遇時嘗遊新豐飲畢將餘酒洗足暴殄至此其能長乎相者喜元盛之才貌不如其父之審其性情岑袁以相斷周之不壽不如以暴殄斷之之爲實也觀李元盛則相之不驗處不如心觀馬周

則相之驗處不如心。

赤族不關乎相

魏元忠三十未遇相者曰、君當貴極人臣、然時有憂懼、皆拜相以前事不足虞、但可當事便行。聞言則應。元忠深服膺之。術士勉人行義、豈凡術哉。李勣知其子當赤其族、然身以奸諛令終。子以討武見殺、敬業與賓王起兵、意固未可定。然勣之生、慚于死多矣。父所贊成、子所蒙害、勣固自赤其族也。知相而不知事、君之義、知相而

不知好還之天知相何益

借相審人才

今人每喜方術。古人借方術審人才。姚崇嘗密令善相者遍視朝官。以武官裴光庭、白崇、卽召至與語。出而曰：宰相所以佐天成化。此非應務之士也。古人爲相身未退時。預思代已之人。用心求才。無所不至如此。

相可覘世運

開元中李林甫聲譽未達。相者謂曰：公相當極

貴國家重刑法、則公典司寇、國家先銓筦、則公  
任冢宰、且秉丹青之筆、當節制之選、列土分茅、  
近古無比、相者第知爲林甫之隆盛、不知乃唐  
室之衰兆于一小人之面目也。大抵君子多生  
厚福之相、天下將昌、小人多生厚福之相、天下  
將亂、又非必人人遍識也。一大君子生厚福之  
相、天下必昌、一大小人生厚福之相、天下必亂。  
此一人者、固消長之宗矣。借相觀人、或可辨人  
才、就人觀相、兼可覘世運。

不自知

林甫十歲時與群兒戲有老父見而嘆曰富貴  
誠不自知此兒後當居中書二十年夫富貴不  
自知何傷正恐富貴後作孽不自知耳

玄宗相福不相德

唐德宗生三日色黑肅代皆不悅玄宗見之大  
喜謂曰汝二人皆不及也後德宗在位獨久然  
玄宗專知福耳若以主德德宗果能勝肅代耶  
玄宗明處皆暗此天寶之所以恃福而取亂亡

裴晉公器宇

裴晉公質狀貌小微時遊洛中有二老見之愕然僕夫在後聞其語曰此人爲將淮西可定天下復太平僕遽以告公曰見我龍鍾故相戲耳若他人聞此決有喜色決往問二老而公泰然如不聞如此人原非餓死器宇

不盈彌貴

丁重謂于棕必入相路巖問其故曰彼已貴矣如百斛重器所貯尚空其半安得不益於祿位



哉。此言貴而不盈。則有受進之地。其旨合道。非術士所及。

相其語言

蔣簡肅早期明瑞以公輔人問之曰。其人言簡而理盡。簡重則尊嚴。此大臣相也。此以聽言爲相。又是一理。

術家不自信其所行

星家多不信命。堪輿家多不信地。理此天下通病也。每見星士推人祿命。勸人營求。大都背理。

傷義使營求果有益。豈冥冥中無心於行素之君子。加惠於僥倖之小人。全無主宰。惟人添換耶。抑如人世有情之屬。受人趨競耶。所謂于得失之數。無纖毫裨。而徒作愧天忤人之事。此推命者之導人衡命也。其原出於不信命也。終身推之。而實不信。不亦異乎。彼將推其一定者耶。既云人能改移矣。將推其改移者。改移又安有窮。而孰從推之。每見堪輿家。自棄祖父不葬。或葬凶地。顧日出爲人。扞坐上帝福人之權。如出

其掌目間又且競誇世傳也。或駁之曰：自爲祖先，畱心地，理間出其暇，偶取世資，猶可解也。公誠世傳公祖，先何不扞卿大夫地而使世世出術士耶？其人無以應，是不惟終身行之而實不信，且累世守之而皆不信也。尤可異也。請進推命者曰：今而後，勸人行素以安命，改過以立命，而後爲俟命，而後可以知命，可以推命，進相地者曰：今而後，且盡心學相地，地理果明矣。遇凡人勸令增脩，遇惡人諷令改行，受吾言則爲求。

之拂吾言徘徊于吾言則皆去之夫然後可以  
得地可以爲人扞地

命與卦課相似

孟子論命與今世異堯舜必不宜有朱均莫致  
而至最不可解故謂之命若從後人推筭則堯  
舜命中宜有不肖之子以可解者爲命矣且夫  
人面無窮人命有極極之數十百萬則皆同以  
天下之人之衆豈能使四柱同者窮通壽夭皆  
同耶然果老醉醒擅名今古要自不誣人身墮

地年月日時便如起成一大數各隨其人用此推筭。深窮其理。纖悉可知。以此八字測窮通。非窮通定于八字中也。譬如占卦止三百八十四爻。極其變不過四千九十六卦。天下萬事萬變。豈止于此。然都可從此占測。又如民間崇信神籤。數僅滿百。借以斷事。亦多奇中。況本身墮地五行。耶。總是數從此現。不從此定。明乎此意。則四在同者。雖受享參差。至於萬萬不同。從無相反之嫌也。果老輩蓋知而不言。今人則惑而已。

矣。不脩其可致者。而欲知其莫致者。果何益耶。

### 傳神

蒲有某生者。以寫照名金陵。來吾邑。趨者如市。余召之。寫天倫圖。復作山居圖。人問若何。曰。古稱傳神不稱傳貌。今并傳貌者。而無之。遂使丈夫也得擅名耳。人之神情。各有所存。亦在貌內。亦在貌外。如相者論魏元忠。貴在怒時。此其特異者也。其餘或在盼睇。或在鬚眉。或在周身。或在動止。無有常家。古之悟此意者。窺定人神所

存下筆點畫之間。而賢愚貴賤。劃然已分。使人望而躍然曰。此某也。蓋得神之妙。有形模未竟。而先傳者。若待官骸色澤。種種妝成。然後使觀者。勉強思維曰。此某也。然而愚知貴賤終不可得。而想也。尚謂傳神乎哉。且夫習狎之人。遠在數十丈之外。望見大畧未辨。口目又或背人而行。遙望其後。面首之大畧亦未見。然爲甲爲乙。燦然不可混。又非人之神情無所不在之一証耶。似者水墨亦似。非者妝染亦非。斤斤摹相。何

謂傳神。凡雖小技。莫不須悟矣。況學道而可無  
默識乎。



幾亭外書卷九目錄

緒緒

小序

註書不可入集

聖人相助

聖有專長

狂狷或勝中行

十世百世

才勝不皆小人

尚書最古

堯典舜樂

三聖兼總六經

周公獨兼三不朽

孔孟無告

賈生四品

漢高類信陵君

豪傑亦有生知

能言不能知

人苦不自見

自違其才

士最戒自衒

明與透之辨

智者好學

內聖外王有分時

古今士大夫

立言寧寡

聽言親於觀書

安信懷

孝不樂旌

作僞因好名

好諛因好名

較量有當用處

發中有蓄

鬼神與俗情不同

何事爲意外

法有不可槩行

謚法不始於周

紀元

漢中王卽位上書

諸葛公名士

誌體

過華過俚

奇正

物有顛倒用

文之今古無恒

文心不俗

文以思傳

蘇長公獨高

史遷尊儒

詩必有志

讀書樂

枉聯體異

研究之說常殊

世說

山人論董字

微生高不直

直在隱中

公儀休舛謬

縮高費禕

魏徵馬周

伐燕是齊宣

王安石尚同

張浚實不足稱

李載贊見誅

載贊諸書

載贊餘腥

載籍太多可憂

腎藏志

才竭欺生

口舌消福

服善不真

貴可以行德

今人苦賤

士愁貧可羞

慕名避名之反

自身放倒豎起

富次壽

役於物者奴

覺炎不避

托言無爲而爲

貧士不安分

士以爲惡自豪

高科能文爲不幸

訓兒俗說

飲宴可以觀人

酗酒

酒色財氣

父兄之惑

勿使人愛勝

物換人換

思健思病

色彰亡國

縛足穿耳

書劉廷式娶盲女事

後

儼

筆

髮網

光粉害穀性

黃白漸耗之故

邑人得謚自魏忠節始

戴婆

題孝婦郁氏傳

鄉人臨歿不亂

遠重近輕

清慎勤

飾言飾行

幾亭外書卷九目錄終

幾亭外書卷九

緒緒

平湖

屠象美

嘉善

周丕顯

全閱

小序

語云精以爲身、緒以爲天下。是二之也。夫天下而可以緒爲也哉。亦安有藏精於身而姑出其緒者耶。言道之緒也。稍緩者緒之緒也。言或緩而不可棄。



註書不可入集

凡註成書皆是我附古人。若列置集中。則是古人附我。倒置甚矣。近見刻二程全書者。趨向已正。視鏤梵書。何啻倍蓰。顧併易傳參入。假如朱子傳註尤多。可勝列乎。俄得二程舊本。帙甚約。乃李文達公序梓。不載易傳。因嘆昔人有識如此。

聖人相助

兩聖人同時並生。各各無待。各自盡人物之性。

然必一君一臣相助實多。

聖有專長

惟心惟德。百世之上。百世之下。皆一也。至于才。則同堂之聖。各有專長。

狂狷或勝中行

質近中行。其力或小。質近狂狷。其力或大。狂狷所就。或過於中行者。有之。參也魯。不亦狷乎。閔冉具體而微。不亦中行乎。一貫傳曾。不傳閔冉。曾子力量大也。此等大事。還得弘毅之士承當。

十世百世

聖人所見極遠。然止是中庸之理。不自以爲奇。子張好高。疑豫知十世爲極難事。雖夫子未可必。夫子說來却極平常。雖百世可知也。子張爽然自失矣。末句專藥子張。答他人又未必爾。

才勝不皆小人

古之言才兼德之謂也。後世有不德之才。因有才勝之說。然謂才勝德爲小人。則君如漢祖唐宗。臣如閻侯鄴侯。皆才勝者也。可謂皆小人乎。

尚書最古

四子皆出於尚書。刪定以後尚書最古。河圖在前。然無文字。

堯典舜樂

堯典不曰唐書。而總入于虞。追述也。舜之樂。不自立名。而曰韶。謙德也。

三聖兼總六經

六經大都有文。王德意是故行。六經者文王作。六經者周公刪定。六經者孔子。

周公獨兼三不朽

德施成功。德吐成言。在昔聖人。發爲事業。則精神爛然。無藉言也。近古君相。拮据以就其所爲。而于德性也不淡。不遑言也。道大行而立言多者。古今一周公而已矣。

孔孟無告

甚矣聖賢之多不幸也。孔孟皆不得見其父。是以有顯親之志。有俱存之慕。蓋懷悲者終其身而不能以告人。

賈生四品

貪夫殉財、烈士殉名、夸者死權、衆庶每生、賈生四語、剖盡世間情品、跳出四者、方是豪傑聖賢、聖賢論德心、豪傑論才氣、所以天下亦有不聖賢而豪傑者、管仲王猛之流是也、其才實足以建事功、濟衆庶、惟殉名一種、常以豪傑自居、然專揀世間好事、歸在一身、或成、或否、究竟于天下國家何利。

漢高類信陵君

漢高祖任性多過。聞言立改。迹其意度。全類信陵君。故每過其祠下。奉祀不絕。視平原等有異焉。誠慕之也。功勲霄壤。則時勢之所分乎。使信陵生於秦季。亦湯武之續矣。然令不交隱者。不善聽士。烏能開基四百。聲施後世哉。

豪傑亦有生知

學積累者。因古知今。性通達者。因今知古。因古知今。體明而用出。因今知古者。暗合乎機宜。而躬脩多背馳也。石勒是也。叔季豪傑。每有生知。

不在理義。多在事變。不學而亂中華者。爲石勒。  
麤知學而治天下者。爲唐文皇。斯真絕世之英。  
姿。生知之異人。惜其學無本原。大德踰閑。不足  
復論。

能言不能知

能言不能行。古人恥之。今言之且不能知之。而  
不恥。

人苦不自見

萬山參差。或萬仞而干天。鸛鵲遇之。殺摩風之。



羽或千百仞下者乃數十仞而遊眺之士可縱步而據其巔也。既陟其巔四顧無復峻者他山人煙棲鳥顧渺然若俯列其下何則視外則易卑自視其所據則易崇也。迨登百仞之巔睇向所據幾等乎丘墳而猶不悟彼千仞者之更高於今所據抑又惡知世有據萬仞之巔者俯而視之又更何如哉。登山漸進則善學者與。

自違其才

有用之士常患用之者違其才。今人平居自負。

徃徃先達其才矣。使聽者不察而信之。安得不敗事。

士最戒自衒

毛遂自薦。定楚趙之從。古今傳其事。然二十人中。缺一人。無甚關係。故平原姑聽之。如韓信。卽不可自薦。薦亦漢高不聽。聽亦衆人不服。受任稍大。則須人主知我。我不可自求也。況佩服聖賢。出處之理者。而急急自衒。思見功能於天下。乎其不祥有三。曰喪道。曰無成。曰取禍。

明與透之辨

月火有光。其體存一處。而光遍照。是之謂明。自內而外也。以簪刺竹筒中之謂透。自外而內也。透是用力。如格物時鑽研。明是成功。如知至後瑩徹。然明人觀物。無不從表達裏。則明者必透。一處透者。未必大段明也。

智者好學

智者常以一隅周海內。常以行事知人心。常以威權示準則。皆從好學得之。專倚聰明。斷難到。

此。

內聖外王有分時

問內聖外王還有分時否曰自漢以下已無外王猶有內聖是亦有分時高惠文景貞觀永徽皆致康阜然無教化其于外王猶遠也諸葛而後濂洛關閩直接孟子之傳而仕不遇時皆無外王之效要令遇時恐于孔孟作用猶不相及

古今士大夫

學而干祿聖人所戒今子弟爲干祿而學舉家

所賢居鄉無獻替古人或以爲忘民今士夫歸  
休但不咀嚼隣里而流連歌舞花竹之間則悠  
然自居高品

### 立言寧寡

聖人以下立言旣多或有小誤莊生齊物論與  
大宗師人間世等皆以三字名篇謂齊萬物之  
議論也程子偶不及思謂其齊物非是楊用脩  
自負文人淡忌道學喜得一問極口詆笑又謂  
朱子字尚不識亦可謂無忌憚矣孟子注海注

江稍違地勢忽舉百鈞人情難推何嘗以此貶  
聖雖然君子立言寧寡毋多寧核毋博守聖人  
闕疑闕文之訓庶不貽小人以間而啓淺學之  
不信乎。

### 聽言親於觀書

揆問觀其書不如聽其言何也曰問辨之間鍼  
鋒有相對處非言者之口精於其書乃聽者之  
耳親於其目。

### 安信懷

安老多壽之道也。信友必達之道也。懷幼多男  
子之道也。同歸愛人亦從其類。

孝不樂旌

人之愛子。不欲人知也。孝其親而欲人知之。是  
以愛子爲恒行。愛親爲高行也。親其子而疎視  
父也。然而孝子有旌。上以風下也。篤行者不樂  
旌。

作僞因好名

名根濃。僞心熟。雖息心養身之事。偶有見于中。

惟恐人之不知。知之或晚。故爲學不去躁去僞。病何由祛。業何由進。譬如食飯自飽。屢號于人。孰不嗤之。

### 好諛因好名

好諛之念。無非好名。然諛言日至。則德衰而名敗。且面諛者。必非樂揚善者也。聞諛而喜。拙于好名。

### 較量有當用處

才德常與勝已者比。則滿假自去。福澤常與不



如已者比。則舐望自消。較量非道心也。中人不妨有此較量。

發中有蓄

炭埋土中。千年不朽。性未發也。燃而爲火。其灰可立而待發之。爲用固難久也。然而均火也。煽以風。則焰彌炎。灰彌迅。聽其自然。則稍久焉。掩以灰。則又久焉。何則。發而有蓄焉之意也。士以才智榮華自多者。亦念及久乍之間乎。

程叔子曾言之

此條頗與暗合。大同小異。故不刪去。

鬼神與俗情不同

世俗畏威焰、鬼神畏正直、當以私學鬼神之公、世俗重已然、鬼神重將來、當以愚學鬼神之智、何事爲意外

自然之理、必然之勢、將然之機、愚者不知、皆謂之意外、惟偶然之事、或爲理所不可知、則誠意外也。聖人所不論

法有不可槩行

法有行於一方、可通於天下者、利民也。有行於

知不足齋叢書  
卷之四  
一方不可通於天下者。取民利也。利民則無風  
土之隔。取民利則或便或不便。如介甫爲令行  
青苗法。民頗安之。後爲相。卒以毒天下。

謚法不始于周

世傳周公創謚法。然殷王中宗、高宗已有廟號。  
高宗又稱武丁。周公因而增擴之耳。湯名履。紂  
名受。湯與紂似亦屬謚。漢祖謚高。昔人云。謚法  
無高。然殷早有之。但高宗、武丁似以高爲廟號。  
武爲謚。漢高以太祖爲廟號。高爲謚。

## 紀元

紀元不可類謚、謚以終其生、元以始其位、

### 漢中王卽位上書

古人讀書亦有句讀訛謬、終莫省覺者、乾九三云、夕惕若厲、无咎、而劉先王卽漢中王位上孝愍帝書云、寤寐永嘆、夕惕若厲、竟以厲字聯上句、當時文士亦多且高文大章、諸葛公當亦過目、竟貽此誤、播天下垂百世、因嘆明道先生作縣令時、親爲鄉塾兒童正句讀、不無關係朝廷、

也

諸葛公名士

名士之稱起於諸葛之巾服臨戎也勲畧震世  
身都將相蟬蛻軒冕履貞蹈素不改士風故懿  
嘆而稱之重在士不在名也簡穎唵哦郵筒徃  
來動矜名士重在名不在士毋乃未識名士之  
義耶昔之名士人號之今之名士自呼之昔之  
名士離士位者當之今之名士守士習者居之

誌體

記事提要纂言鈎玄傳誌體也。卽作史之體。今人汎濫記載。玄要茫然。惟弇州有良史才。惜無公心大識。

過華過俚

子曰辭達而已矣。東漢以降。不能遵也。言之無文。行之不遠。宋儒語錄。不能免也。孔子大聖文章之祖。奈何反之。惟過於華。則不達。故八代之文。使人厭過於俚。則不文。故語錄難使童習而家傳。

奇正

奇正無二致。理所當然。世每莫之知也。當然則正。知所莫知則奇。奇節奇功奇文皆是道。與然正皆善。而奇有惡。是故表稱奇表技稱奇技。憂稱奇憂禍稱奇禍。

物有顛倒用者

五行以顛爲化。然非謂不顛則不化也。文以倒爲奇。然非謂不倒則不奇也。用正處固多於顛倒。

文之今古無恒

文自古而今。皆後世作者求勝前人之所致也。周而秦。西京而東。當其相去未遠。皆日求新以掩古。豈以古不可幾。退處不高。不古之地哉。刻意爭新。適得不古。相去漸遠。乃復望以爲古。而慕之。故求勝而不如者。後世之文人也。惟昌黎歐陽。乘文之敝。故求勝而真勝。

文心不俗

凡落筆能文。必胸中有灑然不染之趣。雖飢寒



迫身不以纏縛也。功名烜赫不以耽溺也。或涉於狂歌酣宴而瀟灑意致。時自不泯。若沉埋世情。雖有高才。漸將消沒。惟世情俗趣與文章最不相投。古人如李杜韓蘇。皆天趣不沒者。今人小小。有文心。亦無不然。

文以思傳

文人氣旺。雖麤疎亦能鼓舞一時。思淡則能久。

蘇長公獨高

韓歐蘇班耶曰。大蘇才賢於韓歐。文不能過也。

蘇空中卷舒古今無兩然韓記歐史蘇亦不敢望韓歐著文不異常人先之以思慮而才足以發之大蘇心不致思手不停麾直舒其才而思慮從焉雖有至精至奇之想皆不以沉湎得之故其才獨勝。

### 史遷尊儒

司馬遷於仲尼作世家于老子則列之莊申韓而已仲尼弟子猶專傳而老子傳且不專是其尊仲尼何如也班固泥其自序中數語遂謂抑

儒尊老而不察而襲其誣者到于今

詩必有志

詩賦同途。賦者詩之變。皆以言志。志在而言。欲  
言而求志。與騷體創自靈均。蓋楚懷棄而原憂。  
楚懷死于秦。而原痛彼其異思。曠懷高言。逸氣  
莫不從忠君愛國發之。宋玉勒差之徒。繩武相  
綴辭。雖工而志不存。早已亡其本矣。相如雄固。  
搜羅奇祕。競相熠燿。志果安在。舒寫懷來。賈長  
沙其庶幾乎。賦家嫌其直。遂則所不免。家靖質

平生好讀賦，所作數十篇。余最愛其北征，正而不露，淡而不詭，麗而不靡。述今昔，明治亂，辨邪正，關得失，文章家推爲賦手，學者讀之，未嘗不有資於理道也。貞婦賦次之，卽掩魏晉以下而登屈子之壇，何愧焉。

### 讀書樂

讀書樂四首，多傳陽明先生作。然全集不載，心久疑之。及閱赤城詩集，乃元人呂六松所爲。六松名起猷，仙居人。昔蘇東坡用故事，必令人簡

閱良可爲法

在聯體異

在聯亦各有體有宜前是後平者有不必拘者  
前必是後必平五七言律體也不唯字數之從  
奇詩有詩句焉不拘者四六詞體也不必字數  
之從偶詞有詞句焉其工拙則與詩相類第一  
忌矜露自述須率真而有關係贈人須含蓄而  
有進益善觀人者見其面聞其言得三四分讀  
其在聯得一分蓋亦書札文詞同類

研究之說常殊

惟聖人洞晰三才。其言如一。稍涉研究。卽難盡同。雖朱子有不同於程子也者。雖今之高子。有不同於程朱也者。寧處於不同。而不敢強所不安。以就之。所以爲窮理也。所以爲不欺其良知。

世說

世說重自弇州。亦自一時寄興。弇州爲文。從不涉其習氣。世俗知重弇州。然學古文詞者。徃徃漫無本領。不用世說句。卽以爲不韻。不帶曲譜。

字卽以爲不豔噫陋也極矣。往屠緯真徐文長之流，猶以六朝俳優揮斥筆端。今日習氣彌陋如此，實袁中郎昆季揚其瀾也。弇州見之，必爲拊鼻。

### 山人論董字

客說有陳山人者，頗有骨性。曾遊董宗伯之門，士人或托求書扇。山人曰：宗伯書雖工，品不貴，不值一錢。人問其故。山人曰：宗伯性情特異，妓童少艾環而乞書，終日淋漓不厭。或名公良士

造門禮求。雖旬月未必得也。求者笑而止。今法帖中傳司馬溫公書。殆亦山人意。

微生高不直

親故倉猝有急。匍匐見求。我又適當其乏。明言宛轉。伸我至情。何害於直。止緣或人未必是至戚。醢又非必不得已之物。微生高委曲周旋。不如直辭之耳。

直在隱中

父子相隱。第一念欲隱。從之而直在。以子証父。



第二念欲証乃是屈曲其初念也。或曰：小人爲不善，第一念卽欲揜從而揜之，亦云直乎？曰：父攘羊，子所不能主也。身攘羊，豈必復以隱不隱論爲親者諱？不云自諱也。

公儀休舛謬

公儀休拔葵出妻，見稱於仲舒，使休而無若事也，則可。休而有是舉也，人理也乎哉？未聞孔子之稱公甫文伯之母者，耶？將使命婦必袖手偃息，乃爲得乎？何以佐男子成其廉法，令休也及

孔曾之門。攻不後於冉求。絕不殊於吳起。

### 縮高費禕

縮高費禕。氣質爲用。未知道也。然決且慧至此。難矣哉。以死相期。見危先逋。誇獵文史。罕所遇。意夫又何人哉。

### 魏徵馬周

魏徵章疏。殊泛濫不足觀。魏徵舌。馬周筆。可以盡忠補過。有其心而無其筆。舌恐入於齧。有其筆舌而無其心。則佞諛之助而已。

伐燕是齊宣

或問伐燕果宣王耶曰然也宣王昏驕孟子惓惓不舍何哉時主皆重縱橫宣猶知重仁義士斯念之明足善之實也聖賢豈以其敬已而私惓惓哉或言潛者宣王薨至潛而失國也惟孟子傳信

王安石尚同

東坡惡安石之同將可令異乎膏沃之壤彌望同一桑麻禾黍是稱上農上農不令他種得雜

于桑麻禾黍也。乃及礲瘠。人力不施。蔓草鬱雜。焉聖人于是。一道德而同風俗。王氏之同。未過也。所以同者。非也。

張浚實不足稱

或問朱子極稱張浚何也。浚有罪而無功。朱子與南軒厚。付其親於不言可矣。大禹蓋愆。後世未嘗稱鯀。而況南軒乎。曰。爲賢者諱。爲親者諱。君子厚道。置浚不論。允爲穩當。第南軒當時。必有爲親乞言之意。文公難爲辭耳。若在聖人。不

知如何處置

李載贄見誅

李載贄之死、邪士恨之、其巧持論者曰、贄之罪、誠不可掩、然君子行誅、必諒其德、太公也、而後可以誅華仕、管仲也、而後可以誅付里乙、子產也、而後可以誅央何、周公也、而後可以誅管叔、孔子也、而後可以誅少正卯、噫、亦不思甚矣、君子立法、豈能必後人皆聖哲哉、後人皆聖哲、法不立可也、因時制宜、上知優爲、中人無法、則不

知所向。法者所以定民之趨。一主上之權爲後。世德不足者。設也。如德不足。不敢以用法。猶自歉。不能遠視。而終身瞑其目。豈不愚哉。且誅惡與賞善何異。自古及今。未有以德薄而廢賞罰者。謂其用刑不當可也。謂刑之誠當而特德非其人。豈所以論刑哉。向令孔子未用三家有人焉。起而誅卯。孔子將非之乎。今誅贊之人。不足以服天下。然其誅之也。何可非乎。劉裕誅玄。裕無異于玄也。然其誅玄。未有非之者也。雖李贊

不以爲非。然則以贊爲不當誅。猶陋也。以爲當誅。而謂誅之非其人。猶未知贊之學者也。故德薄者。增脩其德。可也。因而弛其刑。是益之爲亂也。

載贊諸書

李贊亦是慧資。所集諸書。所著議論。有過人處。但破人鄙滯。豁人胸眼。爲益甚小。喪人廉恥。長人奸橫。爲損極大。故當深惡而嚴絕之。

載贊餘腥

王文成掃訓詁。掃聞見。李贄遂欲掃道理。掃綱常。數十年來。壞盡人心。殺身燬書。世教幸矣。餘腥煽人。稱誦其說者。猶徃徃而是。嗚呼。果獨何心。

載籍太多可憂

載籍太多。憤者頗有祖龍之慕。從古非常之變。皆人心感憤。先爲之兆。今人既動此念。亦是先機。物極必反。恐不久將有此劫。良可憂也。始皇焚燒經典。經典乃益世之書。如何可焚。焚之爲



大無道。今世諸書。除經傳語錄。明性教史鑑典。故載治亂。備禮法。古名詩文。闡事情。此外儘可芟夷。第一宜焚者。藩詞曲譜。第二通俗小說。第三則難言之。文集是也。是宜分別去留。須妙選天下正大文人。如劉向韓愈歐陽脩之倫。爲總裁。擇其有益世道人心者存之。其餘惑世誣民之說。雖文彩極豔。皆從刪削。使今天下載籍。約存百一。孔刪詩書。去其十九。今文漫漶。非詩書比。又宜十之後。世秉權之人。幸反覆於吾言。毋

效秦私。反灰要道。毋同俗憤。玉石不分。則將與  
刪定。比烈焉。無毒焰之嫌矣。

腎藏志

笑語酣暢。遇事奮發。而疎于籌畧者。其人必氣  
旺水虧。或思慮淡詳。而簡靜恬退者。水足而氣  
虛之人也。以是觀人。頗驗益。悟腎藏志之說。然  
此論稟也。充以學問。則去所短。就所長。無偏可  
見。

才竭欺生

英雄欺人自顧伎倆已竭倖人不知若無才困之時欺將焉用才雖困而不忍欺人可以不作。

口舌消福

高才氣者不患屈于人患屈人太甚口舌尖利損德良多標榜據其常勝消折亦大。

服善不真

古人貴貴之義多起于尊賢今人服善之心猶雜以慕勢一言也貴者言之而信賤者言之而輕賤者已貴仍操其說也而向聞者復信之。

貴可以行德

君子富、好行其德、亦唯貴能行其德、季世使之也、方其伏也、以柔下、人人曰無能以量容人而侮辱、日至于是有必不能下、必不能容者矣、勢迫之也、貴則下之容之耳、何忌而不爲、故富而好行德者、古君子之心、貴然後能行德者、今君子之事。

今人苦賤

古之庸情多患貧。今之庸情多苦賤。古人重名

節貴不可以得富。而今人居官致富。舉世安之。故患賤者亦患貧也。得貴而致富之道已兼矣。苦賤之人情似稍高于患貧。實乃世道彌降。而人情彌陋。

士愁貧可羞

士習之卑。對人愁貧。其一態也。市人皇皇求利。亦未必向人言讀書。而口口稱貧。意果何在。或又云。吾固安于貧者。夫既安之。又奚言之。如斯之流。汚趣已極。窮則喪恥。達必毀方。忠告路窮。

遠之已矣。

慕名避名之反

仁義忠信。慕其名。不肯居其實。田宅貨貨。聚其實。必欲避其名。愁貧而人莫信。恥矣。而自以爲巧。身心茫茫焉。無所安頓。苦矣。而自以爲樂。若此者。莫不反於情矣。而自以爲正。

自身放倒豎起

聖賢平心濟物。放倒自身。在萬物中。却是鳳凰。翔於千仞。世俗占便宜。權豎起自身。在萬物上。

吾恐其爲可繫羈之麒麟也。

### 富次壽

五福以富次壽。以衣食足則可以遷善遠罪而有餘則可及人。若奢淫無度則與遷善遠罪意正相反。適爲財害矣。守錢虜不足論。雖及人而驕。自謂好行其德。終是自適其力。故世俗自謂能享富者。皆不善享富之人。上天與之福而不能承。

### 役於物者奴

諺稱富人爲財主。言其主持錢帛也。祖父傳業。雖不可廢。然須約已。周人當捨處。雖多勿吝。不當用處。雖少勿妄。則業不墜而德可行。今之多財者。皆役於財者也。非役財者也。能守能散。是名財主。日慳日積。是名財奴。推此而非名花不觀。亦花奴也。非華園不居。非鮮衣不衣。非美味不食者。亦衣食園囿之奴也。

覺炎不避

大夏炎炎。嬰兒枕於母肱。益炎而躁號哭焉已。



矣。號哭是覺炎也。而終不知去臂。知利之必害。而卽之。其自爲嬰兒乎。其母之不善體嬰兒者乎。

托言無爲而爲

君子存無爲而爲之心。不妨行有爲而爲之善。世人不肯行有爲而爲之善。或反托無爲而爲之言。究竟冷衆人之心。使各不願爲身。亦從而已耳。

貧士不安分

貧士就目前所處爲目前之事此之謂安分凡云不能爲者非繇力歉終因願奢

士以爲惡自豪

爲惡而畏人知者穿窬也其不畏人知者強寇也或以強寇自方謂穿窬之陋不如強寇之豪也聖賢以穿窬愧人今士類乃以強寇自喜哀哉今有范文正者王世教於上士之滅恥寧至于斯

高科能文爲不幸

伊川先生云。少年登高科。不幸也。似有激而發。所謂不幸。不過敗度損年。然居官清慈。居鄉方便。事事利物。語語益人。惟顯者能之。則蚤發可以增德。發後不必斤斤掇管。一意躬脩。與經濟實事。神有專用。則早發可以養身。苟存茲意。何患登科。若願侈志。得損人自肥。流毒衆庶。貽禍子孫。或縱情花柳。聲歌取樂。目前天年暗天。如斯者。不如終老。占卑猶可不益其惡也。雖令中晚登科。亦爲不幸。朱文公十九登科。道明德立。

孟郊登第賦詩云春風得意馬蹄疾一日看遍  
長安花其年蓋不少矣得意輕佻無異一字不  
識者未幾殂喪識量如此何足怪哉何足惜哉  
此無他生平志不立也立志在未發以前則不  
憂既發以後伊川先生又云高才能文章不幸  
也益知其爲睂山發矣然睂山自信道不篤耳  
文才無罪高才能文章孰如周公又孰如孟子  
道以之著豈害道耶且任是絕世高才專力於  
文自喜有餘專力於道自見不足才如顏淵亦

至高矣。既竭以後，猶然未由。龍門睂山，則真覺綽乎餘裕。欣然自得，無他道之事。大文之事，小也。天幸而與之高才，最不當以文人自命。返其聰慧，收其才華，日爲復性之事。將覺皇皇不給。及其有得，舒而爲文，庶不負天賦高才之意。程子之言，欲使人識其爲不幸而善用之耳。

### 訓兒俗說

童子先入之言爲主。予親驗三事，十餘歲時見了凡先生訓兒俗說內一條云：凡聽人語言未

完切勿攙前插口使言者不得竟其說且兩聲  
雜亂使聽者亦不分明又一條云凡食肉菜等  
物從面夾取勿用筯挑亂揀擇若與人共食尤  
爲可厭又一條云凡涕唾須于僻遠處舟行則  
唾水中餘條尚多偶于此三事觸目不忘遂永  
不敢犯又中一條云髮必自櫛若使人櫛是兒  
童時便習驕蹇懶惰之態也此一事則至今愧  
之

飲宴可以觀人

飲宴苦勸人醉。苟非不仁。卽是客氣。不然亦只  
蠢俗也。君子飲酒。率真量情。文人雅客。槩有斯  
致。夫惟市井僕役。以逼爲敬。以虐爲豪。以大醉  
爲歡樂。或士子而效斯習者。必無禮無義人也。  
必不讀書人也。飲酒雖小。可以觀氣志。

酗酒

凡醉酒罵坐之人。皆柔骨人也。無主人也。有主。  
奈何爲酒所持。骨強則平日自能以理折人。何  
必隱忍經時。而藉酒以發。

酒色財氣

俗稱酒色財氣人不飲酒者恒多世間事因酒敗者亦少何反以此居上良以色氣爲病最深而酒之助潘噫也實甚故反以助惡者爲首惡雖係俗語不可謂無次第譬之薦引受上賞教唆服上刑

父兄之惑

身爲姦邪見子挾妓無不拂然怒愛身之智不及愛子夫何故



勿使人愛勝

愛而弗敬。獸畜之也。使人愛而弗敬。獸自處也。使人敬而弗愛。直凌厲人而已矣。非敬也。真敬無弗愛。然君子自持。寧使人敬勝。勿使人愛勝。

物換人換

物無不換。而可長存者。草木葉落。至春復生。以歲換也。人有子孫。以世換也。或疑人身不換。然實以子孫換。特換之候。較物最遲。或曰。松栢不彫而久。曰。松栢非不凋也。新故相承也。他木一

歲中全落全換。松栢新葉漸生。故葉漸除。豈真有數歲之葉。畱于今歲耶。若以不換草木之枝葉。疇非新生。若以換孫子之根氣。疇非祖父一代者。草木之一歲也。其開落遠矣。

### 思健思病

亂時思太平之樂。病中見康健之福。故凡日涉機緣。客遊光景。當時不覺。追懷感傷。在事忘歡。還念得意。然又有苦辛萬狀。而必無害者。人則談之道途。踣躓是也。有頃刻可以喪身。而須臾

立安者人則忘之。舟幾覆而復安是也。是何也。踣蹶必長。舟驚必暫。若論至理。暫者尤不可忘。故亂後太平。愈不忘。亂病後康寧。愈不忘病。

色彰亡國

古來豔色。非必西子楊妃也。吳以亡。唐以亂。故其名特著。美色之彰。天下之不祥也。禍之而後。顯婦人之名。惑之而後。蒙婦人之禍。氓之蚩蚩。其夫差玄宗之謂乎。

縛足穿耳

海外有金齒文身之國、殘軀以飾軀、自戕以爲  
悅、夷之愚也。華人選刺義勇、立名甚美、猶競苦  
之、古昔之法、惟黥罪人、而婦人不知何代沿染  
其風、穿耳縛足、損肉折骨、愈貴介、愈不能免、與  
賈胡剖股藏珠、何異。世傳縛足起自姐已、穿耳  
創於隋煬、未有明徵、然非若人似無此作用。明  
王聿興一洗夷風、微第女稚蒙仁而止也。或曰、  
穿耳誠可罷、若縛足以禁淫奔、似有深意。笑應  
之曰、桑間濮上、私期最多、或者皆足大健行所

致耶。

書劉廷式娶盲女事後

示族第

廷式既登第矣。俗情視之。安肯娶盲婦。且聘而未娶。與既娶而棄者。不猶有間乎。女家又辭而廷式不聽。或曰。登第初歸。以此釣名。生子哭哀。胡可強也。色生愛。愛生哀。天下之哭其妻者。大抵哭色也。耶。生而愛以色。則死而哭之亦以色。是知有色。不知有妻者也。不足稱丈夫也已矣。非獨此也。凡娶妻。必以父母之命。以無色棄。是

知有色。不知有父母也。忘親可以爲人乎。今世  
非必盲女也。以不慊意。卽遠棄之。吾意且申夫  
婦之禮。經時無所出。然後買妾自輔。于時何晚。  
假令廷式當年先時委棄。未必有二男。卽生之  
自他婦。未必皆登第。世知羨二子之榮。而不知  
芝泉之出於盲婦也。蓋醜婦常藏慧性。慧性不  
必在語言幹理之間。若語言幹理之間。又顯諸  
外。非藏諸性矣。而世人上不體父母願室之心。  
中不顧己身正位內外之誼。下不念配匹孕育。

之命於天。本於存心。清夜自維。彼不幸而吾歸。  
理無他徃。生死相從。設以無用之僕。追隨一生。  
猶當盼睵。況父母所娶之室。而廢閣如仇。于心  
安乎。于情忍乎。有廷式之心。則必有廷式之胤。  
縱不必胤於其婦。亦必存是心。躬是行者。然後  
可以他植而榮昌。抑又有說焉。天之報施。至不  
爽也。廷式娶于第後。故復榮其嗣。令未第而懷  
高誼。其榮身亦必矣。設聽女家之辭。而使此女  
長爲生寡之婦。安知廷式不以此斬嗣。卽嗣。

能保無敗類乎。揆之本心則安不安分。邇之天道則福不福異。嗚呼。可以思矣。德惡則棄。不能棄。不成。丈夫色惡則容不能容。則誼虧而心失。已久矣。善者須堅。過者須改。反覆於茲事。天下奈何。猶有不宜室之人。

### 儼

儼以驅疫。非必能驅。然回容執兵以威之。未已也。必有金鼓以喧之。焚芳烈之氣以辟之。藥物之水以灑之。十散一二。亦有是理。聖人于民生。



稍可補救。必不忍置而不爲。若云知其必無益而爲之。是戲也。聖人安肯導人以戲。

筆

作春秋時皆用錐刀刺畫竹簡。後世稱筆則筆。以今時物用。追說古事。非其真也。器因時制。凡紙筆至便之屬。以周孔之藝。猶且不爲。謂其智慮不及。則未必然。謂明知之。而防後人書契之太便巧。僞之滋多。則又近於作意。還是未至其時。聖人不先。

## 髮網

古有巾而無網。故後有垂帶結之餘也。世傳

高皇見道人以髮結網。問所用。曰元首得此。

萬髮皆齊。

高皇善其言。頒行天下。譬如毫

穎制於恬。鏤板創於五季。後人偶爲襲之。誠便  
遂弗能廢也。創器傳後。大抵因便於人情。然鏤  
印之制。害世亦多。道人之網。有便無害。凡制器  
者。在有思慮。防維不在矜巧慧也。不然將有愧  
於道人。

光粉害穀性

白土俗名光粉。海內諸山產此者數處。而餘杭爲盛。置米中助其白色。不過市井作僞。無一毫實用也。惟能使米不生蛀。然蛀實無害於米。白土色白。象秋屬燥。金故能辟蛀。燥能收米中之精華。久而膏枯。獨存膚殼。食之無味。脾土不得所滋。非大有害於穀性耶。驅小害生大害。將安取之。近山居民資此爲生。不復耕織。消有用之粟。帛長無用之僞物。物力人工可爲兩惜。或

疑山澤之利施以予民民既業此夫豈當禁不知利也者可食可衣可用之謂此物無之不爲損有之適爲害特天地之害氣其利安存利氣宜開害氣宜塞第民業旣久驟禁爲難必有時焉必有術焉不可強遏也若江西所產白土堪燒磁器者利用甚普不與光粉同論

### 黃白漸耗之故

天下貧富有形焉有實焉穀帛實也錯鑑形也穀帛有多少勤惰之故也錯鑑有贏縮流壅之

故也黃金之耗以箔故漸少白金之耗以款虜  
然我以百貨仍易而歸

邑人得謚自魏忠節始

吾郡累數千年、威德大業、堪立孔門者、財陸宣  
公一人、吾邑析自宣德五年迄于今、適滿二百  
年矣、顯者幾何、得謚僅自死璫之魏忠節始、亦  
何寥寥也、忠節又不得以豎立膏澤見而以死  
璫見、爲戚耶、衰耶、忠節少以志士自期、嘗作志  
士不忘在溝壑文、淋漓忼壯、卒酬其志、嗚呼、顯

不顯天也。諡不諡人也。惟志可以自持。所持不如忠節。則不如所持而過之。則過之耳。廉頑立懦。聞風者變。而況吾邑親炙之士哉。忠節之以得諡始也。殆有激發後生之烈焉。後生可不勉與。

### 戴婆

戴婆者奉齋信佛年七十矣時往來吾家問之曰婆怖死否曰時到卽行何怖之有時未信又數年婆病果合掌念佛奄然化去不作痛苦呻

嗟彼于生死何悟。不過至誠篤信。無一毫浮情。妄想遂能至此。知慧常易走。作忠信較自堅牢。若樸實人。兼有慧性。真上乘根器也。聖人每每言主忠信。大抵純忠大孝。多出誠樸之人。學不學殊。則盡善與不盡善異耳。

題孝婦郁氏傳

婦人不傳。或以奇節傳。或以至德傳。不然則以夫傳。則以子傳。非是無足傳者。何可求傳。傳亦何必求也。吾聞孝女郁少而孝其母。及爲婦於

曹也事舅姑如母焉。蓋天性云卒之年僅四十餘耳。能感其夫。終身不再娶。能感其子。終身孳孳以求傳其母爲事。孝本庸行。然至誠感人。庸常之事爲難。使後之人讀是說也。而考孝婦之夫爲誰。曰見龍孝婦之子爲誰。曰宗鄭。然後知孝之爲德。雖在閭巷婦人之身。有青雲之力矣。而況丈夫乎。孝婦之子述其母垂歿之言曰。富貴天命。禮義人爲。則是以富貴爲青雲者。不可必也。以禮義爲青雲者。可必也。青雲於富貴。封



軸燦然耳目間不百年而烟消雲冷矣。青雲於禮義則必有正人達士齒頰芬之。墨楮光之時未見貴而或有無窮之重。是故遠干者短近取者長。人子而誠欲不朽其母反青雲於厥身不亦長乎。

鄉人臨歿不亂

鄉人有盛某者。血氣未定之時。有隱過。及長。能忍辱。善營家。致數千金。妻妾各生一子。妾子方七齡。俄而某病。以幼子爲念。妻妬悍。異甚。不恤。

其病顧屢激怒之。某欲爲幼子訂姻。妻不肯。某病漸急。遍召子弟親友至。語以情。且曰。我詰旦必去矣。成此姻事。幼子乃有托。可幸無恙。遂立具書行禮。時已更餘。顧謂衆曰。吾不可死於此。遂令人抱持。遷至正寢。又曰。數日來。吾皆西首。今臨死。須遵聖人東首之禮。移枕於東。乃就卧。子姪坐牀幹。問家事。應對處分無舛錯。評論諸鄉人某宜交。某不可近。至夜分。姻舟回。問有報書乎。曰。有。令攜燈至牀上。扶起諦視其書。曰。此

某親家的筆也、吾安矣、復扶就枕、曰、人死如燈、滅信哉、子姪更有所問、不復應、以爲倦極而息也、持燈視之、瞑矣、喘息不作、痰涎不逆、手足不掣動、寂然而逝、甚異之、以爲若人、其丁謂之儔耶、平生汨沒、臨歿湛然、果安從來、旣而訪之、則旬日前、不勝哀戀、專以幼子締姻爲事、至是其願忽遂、心安故氣靜、乃得如此、然與昏憤嗚咽者、不有間哉、或謂其慳刻已甚、又無分曉、貸于人來償者、析及錙銖、不償則顧委之、某曰、此于

人爲無分曉處。于天卽其寬處也。使不明義理之人。應事酬物。一一斟酌清楚。無絲毫掛漏。尚望有種乎。刺中之疎。筭中之昏。吾猶于若人有取。

### 遠重近輕

遠見重而近見輕。窺其缺也。口多解而身多惑。不反求也。諺云。近僧不重僧。止爲僧家無真道德耳。士之浮慕廣交者。似之。若設誠履蹈化行自近。安有遠重而近輕之理。

清慎勤

天下果有貪肆情之君子。方可云有清慎勤之  
小人。近世儒者以趨向定人。苟與已不合。雖真  
清真慎真勤之士。槩以小人目之。于是所揄揚  
於鄉閭。荐剡於朝。寧則頗有貪肆情者。雜其中  
矣。是明授人以指摘之端也。以實脩實悟之儒  
者。而成心難化。自悞悞人。惜哉惜哉。

飾言飾行

朝廷上尋个好題目。論說一番。便要居家居官。

許多短處。一齊掩蔽人面前。尋着好事體。做得一兩件。便要將身上心上許多病痛。一齊退消。小人以此盜名。固未爲密也。君子以此定人。豈其疎哉。欲明誘之於此。故陰縱之於彼。

幾亭外書卷九終